



REPUBLIKA E SHQIPËRISË

**ENTI RREGULLATOR I ENERGJISË
BORDI**

VENDIM

Nr. 198, Datë 12.12.2019

MBI

APLIKIMIN E SHOQËRISË OST SH.A. PËR MIRATIMIN E TARIFËS SË SHËRBIMIT TË TRANSMETIMIT TË ENERGJISË ELEKTRIKE PËR VITIN 2020.

Në mbështetje të nenit (i) 16; (ii), nenit 19, gërma c, pika i); (iii) nenit 20, gërma “c”; (iv) nenit 21 dhe (v) nenit 55, pika 1, të Ligjit nr. 43/2015 “Për Sektorin e Energjisë Elektrike”, i ndryshuar; “Metodologjisë së llogaritjes së tarifave të transmetimit të energjisë elektrike”, miratuar me vendimin e bordit të ERE-s Nr.180, datë 08.11.2017 dhe neneve 15 dhe 19, pika 1, gërma c, të “Rregullores për organizimin, funksionimin dhe procedurat e ERE-s”, miratuar me vendimin e bordit të ERE-s nr. 96, datë 17.06.2016, Bordi i ERE-s në mbledhjen e tij të datës 12.12.2019, mbasi shqyrtoi relacionin nr. 114/16, datë 10.12.2019, të përgatitur nga Drejtoria e Tarifave dhe Çmimeve, mbi refuzimin e aplikimit të shoqërisë OST sh.a. lidhur me kërkesën për miratimin e tarifës së shërbimit të transmetimit të energjisë elektrike për vitin 2020,

Konstatoi se:

- ERE me vendimin nr. 180, datë 08.11.2017, ka miratuar metodologjinë e llogaritjes së tarifave të transmetimit të energjisë elektrike, e cila ka për qëllim përcaktimin e parimeve, kushteve dhe procedurave të tarifave të përdorimit të rrjetit të transmetimit mbi bazën e parimeve të llogaritjes së këtyre tarifave duke vlerësuar të dhënat e domosdoshme për një tarifë të drejtë.
- Shoqëria OST sh.a. në zbatim të sa më sipër cituar, me shkresën protokolluar në ERE me nr. 712 Prot, datë 06.11.2019, ka paraqitur kërkesën për aplikim për tarifën e transmetimit të energjisë elektrike për vitin 2020.
- Aplikimi i paraqitur nga shoqëria OST sh.a. është në tejkalim të afatit të përcaktuar në pikën 1 të nenit 21 të “Rregullores për organizimin, funksionimin dhe procedurat e ERE-s”, miratuar me vendimin nr. 96, datë 17.06.2016, të Bordit të ERE-s dhe është konstatuar me mangësi në të dhënat e paraqitura nga shoqëria OST sh.a., në kundërshtim me parashikimet e nenit 22 “Rregullat e përgjithshme për paraqitjen e aplikimeve për përcaktimin/ rishikimin e tarifave dhe çmimeve të shërbimeve të energjisë elektrike dhe/apo të gazit natyror nga shoqëritë që ushtrojnë veprimtarinë në Sektorin e Energjisë”, të “Rregullores për organizimin, funksionimin dhe procedurat e ERE-s”, miratuar me vendimin Nr. 96, datë 17.06.2016, të Bordit të ERE-s.
- Koha e mbetur në dispozicion për shqyrtimin dhe analizimin e aplikimit të paraqitur deri në fund të këtij viti, nuk mundëson marrjen e një vendimi nga ana e ERE-s, bazuar në një proces sa më gjithëpërfshirës dhe transparent me palët e interesuara, duke patur në konsideratë impaktin që do të

kishte ndryshimi i tarifës për përdoruesit e rrjetit të transmetimit të energjisë elektrike dhe të klientët fundorë.

- Aplikimi i paraqitur, nuk ka një analizë të detajuar të (CAPEX & OPEX) të 10-muajve tashmë të mbyllur të vitit 2019, si dhe parashikimin e pritshëm për pjesën e mbetur të vitit 2019, konform listës së llogarive për qëllime të rregullimit për aktivitetin e transmetimit të energjisë elektrike.
- Nuk është paraqitur plan i rishikuar i investimeve për vitin 2020. Vlera e investimeve të reja për vitin 2020 të paraqitura në aplikimin për tarifë nuk përputhet me planin e zhvillimit të paraqitur nga shoqëria për periudhën 2015- 2025
- Në kushtet kur:
 - ✓ Shuarja e detyrimeve të ndërsjellta mes shoqërive nuk është realizuar ende.
 - ✓ Sipas raportimeve të shoqërisë, tarifa aktuale e miratuar nga ERE mbulon nevojat për ushtrimin e aktivitetit nga OST sh.a.,
 - ✓ Kërkesa për rritje të tarifës së transmetimit, për të mbuluar të ardhurat e kërkuara për vitin 2020, për realizimin e pagesave të principaleve dhe interesave, nuk mund të merret në konsideratë deri në momentin e shuarjes së detyrimeve të ndërsjella, të cilat për rrjedhojë do të sillnin ndryshimin e llogarive të pozicionit financiar të shoqërisë, kjo në përputhje dhe me parashikimet e VKM nr. 253, datë 24.04.2019, “Për miratimin e planit të konsolidimit financiar të sektorit publik elektroenergjitik”.
 - ✓ Me vendimin nr. 266, datë 21.12.2018, bordi i ERE ka vendosur të miratojë tarifën e shërbimit të transmetimit të energjisë elektrike për vitin 2019, në vlerën prej 0,75 (zero pikë shtatëdhjetë e pesë) Lekë/kWh.
 - ✓ Metodologjia e llogaritjes së tarifave të transmetimit të energjisë elektrike e miratuar me vendimin e Bordit të ERE-s nr. 180, datë 08.11.2017, parashikon axhustimin/korrigjimin e tarifës së transmetimit të energjisë elektrike në periudhën pasardhëse rregullatore.

Për gjithë sa më sipër cituar, bordi i ERE-s,

Vendosi:

1. Mos fillimin e procedurës për shqyrtimin e aplikimit të shoqërisë OST sh.a. për miratimin e tarifës së shërbimit të transmetimit të energjisë elektrike për vitin 2020 prej 1.2 lekë/kWh.
2. Lënien në fuqi të vendimit nr. 266, datë 21.12.2018, të Bordit të ERE, në lidhje me tarifën e shërbimit të transmetimit të energjisë elektrike për vitin 2020.
3. Drejtoria e Çështjeve Ligjore, të njoftojë aplikuesin për vendimin e bordit të ERE-s.

Ky vendim hyn në fuqi menjëherë dhe e shtrin fuqinë juridike që nga data 01.01.2020.

Për këtë vendim mund të kërkohet rishikim brenda 7 ditëve kalendarike si dhe mund të bëhet ankim në Gjykatën Administrative Tiranë, brenda 30 ditëve kalendarike nga dita e publikimit në Fletoren Zyrtare. Ky vendim botohet në Fletoren Zyrtare.

KRYETARI
Petrit AHMETI